

REVISTA SITUASAUN – JANEIRU 2016

ASUNTU NE'EBÉ PRESIZA TAU ATENSAUN

- ▶ **Insidente Sa'e Maka'as no Sériu Akontese iha Munisipiu Likisá ho Total 18 husi Insidente 139 iha Fulan Janeiru;**
- ▶ **Provoka no Asalta Malu entre Juventude no Hada'et ba Grupu Komunitade iha Postu Administrativa Lospalos, Munisipiu Lautein;**
- ▶ **Insidente Liga ba Disputa Rai Sa'e Maka'as iha Janeiru.**

INSIDENTE SA'E MAKA'AS NO SÉRIU AKONTESE IHA MUNISIPIU LIKISÁ HO TOTAL 18 HUSI INSIDENTE 139 IHA FULAN JANEIRU

Belun ho nia Sistema Atensaun no Responde Sedu (AtReS) iha Janeiru 2016 rekolla insidente violénsia hamutuk 139 no insidente 18 mak akontese iha Munisipiu Likisá. Iha Munisipiu Likisá, número violénsia ne'e konsidera aas liu kompara ho número iha fulan sira liu ba ho average (rata-rata) insidente 7.9 kada fulan. Husi número ne'e kategoria insidente ne'ebé aas liu mak konfliktu entre juventude hamutuk insidente 7, ne'ebé kauza husi hemu tua lanu depois goza malu. Insidente liga ho juventude mós iha ligasaun ho eis grupu arte marsiais, ne'ebé rejista insidente 4. Iha número insidente 4 seluk liga ho problema rai no baliza rai.

Iha Janeiru, akontese Insidente 4 ne'ebé rezulta ema na'in 5 mate, insidente 2 akontese iha Likisá ne'ebé rezulta ema na'in 3 mate. Iha loraun 17 Janeiru, iha Bazartete, la'en deskonfia nia feen halo adulteriu, depois sira diskute malu to'o ikus la'en buti nia feen nia kakorok no silu tohar nia kakorok to'o mate kedas iha fatin no hakoi iha mota ninin. Sobriñu ida ne'ebé haree no hasé la'en ninia hahalok entaun la'en mós oho tan sobriñu no hakoi mós iha mota ninin. Oan na'in rua mak deskobre problema ne'e iha loraun tuir mai no Polisia mak halo atendimentu no lori ba halo autópsia. Insidente hanesan mós akontese iha Likisá iha 26 Janeiru ne'ebé la'en oho nia feen tanba deskonfia halo adulteriu ho mane seluk. Enkuantu insidente 2 seluk, ida akontese iha Gariuai, Munisipiu Baukau iha loraun 25 Janeiru ne'ebé komunitade sira hetan mate isin ida ne'ebé deskonfia ema oho no soe iha toos laran, no insidente seluk akontese iha 21 Janeiru, iha Colmera Dili, ne'ebé katuas ida mate iha Hotel Colmera. Seidauk hatene loos razau husi katuas ne'e mate no prosesu submete hela ba investigasaun, maibé familia sira deskonfia ema seluk mak oho katuas ne'e.


Totál Insidente Violénsia Fulan Janeiru 2016	
Munisipiu	Insidente
Aileu	3
Ainaru	7
Baukau	12
Bobonaru	5
Covalima	7
Dili	45
Ermera	8
Lautein	5
Likisá	18
Manatutu	6
Manufahi	10
Oekusi	10
Vikeké	3
Totál	139

PROVOKA NO ASALTA MALU ENTRE JUVENTUDE NO HADA'ET BA GRUPU KOMUNITADE IHA POSTU ADMINISTRATIVA LOSPALOS, MUNISIPIU LAUTEIN

Bazeia ba rezultadu monitorizasaun iha Sistema AtReS hatudu katak, número insidente ho karakteristiku "grupu asaltu malu" sa'e maka'as iha Novembru no Dezembru 2015 to'o Janeiru 2016. Iha Novembru 2015 rejista insidente 34 no Dezembru 2015 rejista insidente 42, enkuantu iha Janeiru 2016 rejista insidente 34. Número grupu asaltu malu ne'e diferente kompara ho número iha tinan kotuk iha fulan sira hanesan, iha Novembru 2014 rejista insidente 17, Dezembru 2014 insidente 16 no Janeiru 2015 hamutuk insidente 12.

Iha Janeiru, akontese insidente rua "grupu asaltu malu" ne'ebé konsidera sériu liu iha Postu Administrativa Lospalos. Insidente rua ne'e Belun deskreve ona ho detallu iha Alerta insidente iha loraun 21 Janeiru. Impaktu husi insidente ne'e ema na'in 6 husi Aldeia Asalainu no na'in 2 husi Aldeia Motolori hetan kanek todan tanba sona ho tudik no baku ho ai-dona, inklui sunu uma 2 iha Aldeia Motolori. Insidente ne'e responde husi Polisia Lautein no Batallaun Orden Públiku (BOP) husi Munisipiu Baukau, hodi kaer autór sira no submete ba prosesu investigasaun no detein balun. Rede Prevensaun no Responde Konfliktu (RPRK) Lospalos ho suporta husi Belun, fasilita halo rekonsiliaun no prevensaun ba konfliktu entre familia vítima no suspeitu iha 25 Fevreiru maske prosesu legál kontinua nafatin.

Insidente ne'ebé iha impaktu boot no halo komunitade preokupa durante fulan 6 husi Agostu 2015 to'o Janeiru 2016 kompara ho tinan kotuk Agostu 2014 to'o Janeiru 2015 mak grupu asaltu malu, estraga propriedade, insidente mosu tanba hemu tua lanu no insidente violénsia ho fatuk. Atu hatene klaru liu bele hare gráfico iha kraik.




INSIDENTE LIGA HO DISPUTA RAI SA'E MAKA'AS IH JANEIRU, MAIBE LAIHA INSIDENTE BARAK LIGA BA EL-NINO


Rezultadu monitorizasaun Sistema AtReS hatudu insidente violéncia liga ho disputa rai ba uma no disputa rai ba toos/natar hamutuk insidente 28 mak akontese iha Janeiru husi total insidente 139. Númeru ne'e konsidera aas liu kompara ho fulan sira antes ne'ebé average (rata-rata) insidente 17.0 kada fulan, no mós kompara ho Dezembru 2015 ne'ebé iha de'it insidente 9. Problema rai mosu ho nia karakterístiku tanba tempu udan, agrikultór sira komesa preokupa ho sira nia toos no natar, nune'e sira hamoos du'ut hakat liu baliza ema seluk nian hodi hamosu konfliktu. Karakterístika balun liga ba deklarasaun na'in ba rai bainhira ekipa Sistema Nasionál Cadastral ho Diresaun Terras Propriedade no Servisu Kadastrais tun ba baze (insidente 4), seluk hanesan insidente mosu bainhira governu halo konstrusaun no rehabilitasaun edifísiu no estrada (insidente 8). Insidente tanba disputa rai akontese barak iha fulan ida ne'e liga liu ba vida agrikultór fila fali ba toos/natar iha tempu udan (insidente 16). Maske nune'e, Sistema AtReS seidak hetan númeru insidente maka'as liga ba rai no disputa bee tanba bailoro naruk iha Suku balun iha Timor Leste hanesan impaktu husi El-Nino. Iha insidente ida mak akontese iha Leotela, Likisá ne'ebé liga ba asesu bee, ne'ebé mane katuas na'in 2 hakilar malu no baku malu iha dadeer ida tanba hadau malu bee-moos. Iha akontesimentu ne'e, Katuas ida ba taka bee no katuas ida seluk hakilar tanba ninia tanke bee seidak nakonu, maibé akontesimentu ne'e la hatene iha ligasaun ho El-Nino ka lae?

Insidente liga ba disputa rai akontese iha Dili akontese insidente 8, Likisá 4, Oekusi 4, Aileu insidente 2, Ainaro 2, Baukau 2, Covalima 2 no Manatuto 2, iha Ermera 1 no Manufahi 1.


KARATERÍSTIKA INSIDENTE




Insidente Fatin




Metodu Violensia




Tipu Violensia



See Mak Hahu / Halo Violensia?



Hun no Abut Konfliktu




Ema Ne'ebe Hahu Violensia Nia Jeneru saida?




Vitima Nia Jeneru Saida?



See Mak Responde?





ATIVIDADE PREVENSAUN NO RESPONDE BA KONFLITU

Atividade Ne'ebé Hala'o Husi Ekipa Atensaun no Responde Sedu (AtReS)

- Iha 18 Janeiru, Ekipa Jestor AtReS Belun ba vizita Servisu Investigasaun Kriminál Nasionál (SIKN) iha edifísiu Caicoli Dili. Objetivu importante mak atu haree no halo komparasaun númeru kazu ka insidente kada fulan no tinan ho dadus PNTL. Iha oportunidade hanesan enkontru hodi hametin kolaborasaun servisu di'ak liu tan no mós fahe revista situasaun fulan Dezembru 2015 no informa mós insidente ne'ebé akontese iha Lospalos iha loron 17 no 18 Janeiru.



- Iha loron 15 Janeiru, Sekretáriu Estadu Juventude no Desportu liuhosi Sekretariadu Parlamentu Foin-Sa'e bolu fali nia parseiru sira ne'ebé halo monitorizasaun ba prosesu selesaun no eleisaun ba Membru Parlamentu Foin-sa'e terseiru lejislatura, hodi hato'o sira nia rezultadu monitorizasaun. ONG Belun ne'ebé halo monitorizasaun ba prosesu ne'e mós hetan oportunidade hodi hato'o rezultadu ba prosesu selesaun no eleisaun Parlamentu Foin-Sa'e. Sorumutu ne'e hala'o iha Uma Biti Boot – SEJD;

Atividade Ne'ebé Hala'o Husi Ekipa Mediasaun no Rezolusaun ba Disputa Rai (MRDR)

- Iha loron 12 Janeiru, fasilita mediasaun ba disputante rai privadu iha Suku Sau, Manatutu. Partisipante mak hanesan mediator mai husi ekipa DTPSC Manatutu, mediator husi Belun no disputante na'in 6. Mediasaun ne'e hala'o iha Edifísiu DTP Manatutu ho rezultadu katak, levantamentu la bele kontinua tanba deklarasaun husi disputante la forte;
- Iha loron 21 Janeiru, fasilita mediasaun ba disputa rai abandonadu iha Suku Lahomea, Maliana iha Edifísiu DTP Maliana. Partisipa iha atividade ne'e mak hanesan mediator husi DTPSC Maliana, Mediator husi Belun ho disputante na'in 7. Rezultadu mak ida-idak nafatin ho ninia pozisaun no la-hetan konkordánsia ruma.

Atividade Ne'ebé Hala'o Husi Ekipa Programa Apoiu Polisiamentu Komunitária (PAPK)

Halo sosializasaun kona-ba prosedimentu atu sai na'in ba rai iha nivel suku. Objetivu importante husi atividade ne'e mak komunidadade hetan informasaun oinsá halo levantamentu sai na'in ba rai. Atividade ne'e partisipa husi Xefe Aldeia no Komunidadade sira. Atividade ne'e hala'o iha fatin balun hanesan tuir mai ne'e:

Data	Suku	Partisipante		
		Feto	Mane	Total
20 Janeiru	Suku Betano, Same, Manufahi	7	113	120
20 Janeiru	Suku Debos, Suai, Covalima	63	87	150
22 Janeiru	Suku Liurai, Turisca, Manufahi	17	113	130

KONA-BA REVISTA NE'E

Revista situasaun ne'e relata kona-ba asuntu xave relaciona ho insidente violénsia no tendénsia konflitu husi koleasaun dadus monitorizasaun liuhosi Sistema Atensaun no Responde Sedu (AtReS), ne'ebé kobre iha postu administrativu 43, suku 208, husi Postu Administrativa 65 iha Timor-Leste durante Janeiru 2016. Belun esforsu atu fahe informasaun ne'ebé up-to-date no serteza ho dadus atual. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dadus ne'ebé ami iha, liu husi sistema AtReS.

Marília Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevenasaun Konflitu & Política: laurensius.belun@gmail.com